

Verklagsreglur

Lífeyrissjóðs starfsmanna Búnaðarbanka Íslands hf. um viðskipti stjórnarmanna og starfsmanna lífeyrissjóðsins með fjármálagerninga

Gildissvið og markmið

1. gr.

Reglur þessar eru settar samkvæmt 5. tl. 3. mgr. 29. gr. laga nr. 129/1997, um skyldu- tryggingu lífeyrisréttinda og starfsemi lífeyrissjóða, með síðari breytingum.

Þær taka, eftir því sem við á, til Lífeyrissjóðs starfsmanna Búnaðarbanka Íslands hf. („LSBÍ“ eða „lífeyrissjóðurinn“) stjórnarmanna, starfsmanna og nátengdra aðila. Með stjórnarmanni er bæði átt við aðalmann í stjórn sjóðsins og varamann í stjórn lífeyrissjóðsins sem hefur aðgang að gögnum.

Rekstur LSBÍ er í höndum Arion banka hf. („bankinn“) samkvæmt sérstökum rekstrarsamningi. Framkvæmdastjóri sjóðsins er ráðinn af stjórn og er starfsmaður lífeyrissjóðsins. Verklagsreglur bankans varðandi verðbréfaviðskipti starfsmanna skulu gilda fyrir starfsmenn hans sem koma að ákvörðunum um eða framkvæmd viðskipta sjóðsins með fjármálagerninga.

Þeir starfsmenn bankans sem starfa á eignastýringasviði, nánar tiltekið á sviði eignastýringar fagfjárfesta, koma að fjárfestingarákvörðunum fyrir lífeyrissjóðinn. Ákvarðanir um viðskipti með einstaka fjármálagerninga eru því að öllu jöfnu ekki teknar á stjórnarfundum sjóðsins.

Reglunum er ætlað að koma í veg fyrir hagsmunaárekstra í starfsemi LSBÍ og jafnframt að draga úr hættu á að þeir sem reglurnar taka til tengist einstökum úrlausnarefnum með þeim hætti að fyrirfram megi draga í efa óhlutdrægni þeirra við meðferð og afgreiðslu einstakra mála. Reglunum er ætlað að tryggja vandaða starfshætti sem stuðla að trúverðugleika sjóðsins, stjórnar hans og starfsmanna.

Skilgreiningar

2. gr.

Í reglum þessum merkir:

Nátengdir aðilar:

- a. maki eða sambúðarmaki.
- b. börn, kjörbarn eða stjúpbörn sem eru á framfæri viðkomandi.
- c. lögaðili, ef stjórnarmaður, starfsmaður eða annar nátengdur aðili hefur aðkomu að fjárfestingarákvörðunum eða fer, á beinan eða óbeinan hátt, með ráðandi hlut í.

Innherjaupplýsingar:

Með innherjaupplýsingum er átt við nægjanlega tilgreindar upplýsingar sem ekki hafa verið gerðar opinberar og varða beint eða óbeint útgefendur fjármálagerninga, fjármálagerningana sjálfa eða önnur atriði og eru líklegar til að hafa marktæk áhrif á markaðsverð fjármálagerninganna ef opinberar væru. Upplýsingar teljast opinberar þegar útgefandi fjármálagerninga hefur birt almenningi á Evrópska efnahagssvæðinu þær.

Fjármálagerningar:

Með fjármálagerningi er átt við fjármálagerninga eins og það hugtak er skilgreint í lögum nr. 115/2021, um markaði fyrir fjármálagerninga.

Meðferð innherjaupplýsinga

3. gr.

Þeim sem þessar reglur taka til og sem búa yfir innherjaupplýsingum er óheimilt:

1. að nota þær til að eiga viðskipti, fyrir eigin reikning eða reikning þriðja aðila, beint eða óbeint, fjármálagerninga sem upplýsingarnar varða. Notkun innherjaupplýsinga til að afturkalla eða breyta fyrirmælum í tengslum við fjármálagerning sem upplýsingarnar varða telst einnig innherjasvik, ef fyrirmælin voru lögð fram áður en hlutaðeigandi aðili bjó yfir innherjaupplýsingum;
2. að ráðleggja öðrum, á grundvelli upplýsinganna, að annar aðili eigi viðskipti með viðkomandi fjármálagerning, eða hvetja til þess að sá aðili ráðist í slík viðskipti; eða
3. að ráðleggja öðrum, á grundvelli upplýsinganna, að annar aðili afturkalli eða breyti fyrirmælum í tengslum við fjármálagerning, eða hvetur til að sá aðili ráðist í slíka afturköllun eða breytingu.
4. að miðla innherjaupplýsingum til þriðja aðila, nema miðlunin fari fram í eðlilegu sambandi við starf, stöðu eða skyldur þess sem upplýsingarnar veitir.

Markaðshegðun

4. gr.

Þeim sem þessar reglur taka til er óheimilt að taka þátt í, stuðla að eða hvetja til viðskipta með fjármálagerninga eða annarra aðgerða í því skyni að gefa ranga mynd af umfangi viðskipta með tiltekna fjármálagerninga eða hafa óeðlileg eða óhæfileg áhrif á verðmyndun í viðskiptum með fjármálagerninga.

Jafnframt er þeim óheimilt að eiga viðskipti fyrir eigin reikning með því að nýta sér í eigin þágu viðskiptakjör sem LSBÍ kann að njóta hjá þriðja aðila.

Ennfremur skulu þeir ekki eiga viðskipti með einstaka fjármálagerninga á sama tíma og lífeyrissjóðurinn eða sem lífeyrissjóðurinn hyggst eiga viðskipti með fyrir eigin reikning í nánustu framtíð þegar þeir hafa vitneskju um slík viðskipti vegna starfsins. Þó er heimilt að taka þátt í almennum útboðum verðbréfa þar sem óskað er eftir tilboðum í hluti á föstu gengi eða

fyrir fram ákveðnu verðbili en ekki er óskað eftir tilboðum um verð einstakra bréfa, gengi eða vaxtakjör og þeir ganga ekki fyrir sem fyrstir skrá sig.

Þagnarskylda

5. gr.

Stjórnarmenn og starfsmenn hans eru bundnir þagnarskyldu um allt það sem þeir fá vitneskju um í starfi og leynt á að fara samkvæmt lögum eða eðli máls.

Þess ber ætíð að gæta að innherjaupplýsingum og upplýsingum sem þagnarskylda hvílir á sé ekki miðlað til fleiri aðila en brýna nauðsyn ber til í hverju tilviki. Stjórnarmenn og starfsmenn sjóðsins skulu hafa reglu á því hverjir hafi aðgang að innherjaupplýsingum og hvernig þeir miðla slíkum upplýsingum sín á milli. Þagnarskylda helst þótt látið sé af starfi.

Hæfi

6. gr.

Stjórnarmaður er vanhæfur til að eiga aðild að ákvörðun um viðskipti sjóðsins með fjármálagerninga ef hann hefur hagsmuna að gæta, sem kynnu að fara í bága við hagsmuni sjóðsins eða gagnaðilans í viðskiptunum. Sama gildir ef um er að ræða ákvarðanir sem tengjast nátengdum aðila. Þá skal framkvæmdastjóri sjóðsins vekja athygli stjórnar lífeyrissjóðsins eigi framangreint við um hann.

Stjórnarmaður sem veit um ástæður er kunna að valda vanhæfi hans skal án tafar vekja athygli á þeim.

Tilkynningaskylda

7. gr.

Stjórnarmenn skulu tilkynna framkvæmdastjóra lífeyrissjóðsins og Regluvörslu Arion banka um öll viðskipti sín og nátengdra aðila með fjármálagerninga. Framkvæmdastjóri skal tilkynna formanni stjórnar lífeyrissjóðsins og Regluvörslu Arion banka um öll viðskipti sín og nátengdra aðila með fjármálagerninga. Tilkynna skal um framangreind viðskipti samdægurs en þó eigi síðar en við upphaf næsta vinnudags eftir að þau voru gerð. Framkvæmdastjóri skal jafnframt tilkynna stjórn ef hann hyggst nýta kauprétt sinn í Arion banka, sem starfsmaður í hlutastarfi hjá bankanum. Tilkynna skal um viðskipti stjórnarmanna og framkvæmdastjóra með afleiðusamninga bæði þegar þeir eru gerðir og við uppgjör. Framangreind tilkynningaskylda tekur jafnframt til viðskipta með fjármálagerninga sem gerð eru í nafni félags sem stjórnarmaður og framkvæmdastjóri eða fjölskylda þeirra eiga ráðandi hlut í.

Framangreind tilkynningarskylda tekur ekki til viðskipta sem framkvæmd eru í eignastýringu þar sem engin samskipti hafa farið fram í tengslum við viðskiptin milli viðkomandi stjórnarmanns og viðskiptastjóra.

Tilkynningarskyldan tekur jafnframt ekki til viðskipta með fjármálagerninga sem tilheyra ekki íslenskum markaði og þar sem uppgjör eða verðþróun þeirra tekur ekki mið af þeim markaði. Þá tekur tilkynningarskyldan ekki til viðskipta með hlutdeildarskírteini í verðbréfa- eða fjárfestingarsjóðum að því tilskildu að hlutaðeigandi stjórnarmaður taki ekki þátt í stjórnun viðkomandi sjóðs. Eftir atvikum getur 6. gr reglna þessara átt við varðandi hæfi stjórnarmanns til ákvörðunartöku um viðskipti sjóðsins með slíka fjármálagerninga.

Lífeyrissjóðurinn skal halda skrá um tilkynningarskyld viðskipti samkvæmt framangreindu þar sem a.m.k. eru skráðar upplýsingar um auðkenni fjármálagernings, hvort um kaup eða sölu er að ræða, fjárhæð nafnverðs, fjárhæð viðskipta og tímasetningu viðskipta.

Rannsóknarskylda

8. gr.

Leiki vafi á því hvort fyrirhuguð viðskipti geti samrýmst ákvæðum þessara reglna eða önnur atvik séu með þeim hætti að ákvæði þessara reglna eigi við skulu þeir aðilar sem reglur þessar taka til leita álits framkvæmdastjóra eða formanns stjórnar LSBÍ, eftir því sem við á, sem sker úr um slík atriði áður en viðskipti eru framkvæmd eða önnur skref stigin sem gætu brotið gegn reglunum.

Undirritun yfirlýsingar

9. gr.

Stjórnarmenn og framkvæmdastjóri LSBÍ skulu undirrita yfirlýsingu um að þeir hafi kynnt sér og nátengdum aðilum þessar reglur og skuldbindi sig til að hlíta þeim, sbr. fylgiskjal með þessum reglum.

Eftirlit

10. gr.

Formaður stjórnar og framkvæmdastjóri LSBÍ, skulu sjá til þess að reglurnar séu almennt á vitorði stjórnarmanna ásamt þeim sem reglurnar varða. Einnig ber ofangreindum að sjá til þess að reglurnar séu jafnan aðgengilegar fyrir þá sem undir þær heyra. Formaður stjórnar og framkvæmdastjóri LSBÍ hafa eftirlit með að reglum sé fylgt, s.s að tryggja að yfirlýsingar séu undirritaðar.

Innan Arion banka hf. er starfandi regluvörður en hlutverk hans er m.a. að fylgjast með verðbréfavíðskiptum starfsmanna bankans.

Stjórn sjóðsins gerir samning við Arion banka varðandi aðgengi að upplýsingum tengt reglum þessum og upplýsingagjöf regluvarðar til stjórnar sjóðsins varðandi eftirlit af hálfu bankans með verðbréfavíðskiptum þeirra starfsmanna bankans sem koma að ákvörðunum um eða framkvæmd viðskipta sjóðsins með fjármálagerninga.

Stjórnarmenn og framkvæmdastjóri skulu veita Regluvörslu Arion banka umboð til að sækja árlega, hjá viðeigandi verðbréfaskráningu, yfirlit yfir verðbréfaviðskipti þeirra og nátengdra aðila. Regluvarslan fer yfir hvort öll tilkynningarskyld viðskipti hafi verið tilkynnt og kynnir niðurstöður fyrir stjórn.

Brot á reglum

11. gr.

Brot á reglum þessum skal tafarlaust tilkynna stjórn LSBÍ sem, eftir eðli brots, skal tilkynna það Fjármálaeftirlit Seðlabanka Íslands..

Viðurlög

12. gr.

Brot á reglunum geta varðað áminningu eða uppsögn aðila er brjóta gegn þeim ásamt því að eftir því sem við verður komið gangi viðskipti sem brjóta gegn reglunum til baka. Brot á ýmsum ákvæðum reglnanna geta falið í sér brot á lögum og getur viðkomandi því sætt viðurlögum samkvæmt þeim.

Gildistaka

13. gr.

Reglur þessar taka gildi við samþykki stjórnar LSBÍ og að fenginni staðfestingu Fjármálaeftirlits Seðlabanka Íslands samkvæmt lögum.

Ofangreindar reglur eru samþykktar á stjórnarfundi LSBÍ 9. september 2002, með breytingum gerðum á stjórnarfundi þann 4. mars 2009, 3. september 2013, 21. júní 2018, 29. ágúst 2022 og á stjórnarfundi 12. júní 2025.